

Тилнинг суяги йўқ



16:00 / 26.04.2023 2433

Имом Музаний айтади:

«Бир куни мен «фалончи каззоб» дедим. Бу гапимни имом Шофеъий эшитиб қолиб деди:

«Эй Музаний! Гапингга чиройли кийим кийдир. «Каззоб» дегандан кўра «унинг гапи ҳеч нарсага арзимади», деганинг яхшироқ!».

Чиройли сўзларни топиб гапиришга ўрганишимиз лозим. Унинг таъмини бошқаларга тоттиришимиздан олдин ўзимиз тотиб кўришимиз лозим.

Тилнинг суяги йўқ. Аммо тил суякни синдириши мумкин.

Олдингиларни Аллоҳ раҳматига олсин. Биз бугун танамизни чиройли либослар билан ўраганимиз каби, аввалгилар фикрларини гўзал либослар билан ўрашар эди!

Бир куни Умар ибн Хаттоб розияллоҳу анҳу олов ёқиб ўтирган кимсалар олдидан ўтиб қолди. Уларга «Ассалому алайкум эй нур эгалари!», деди. Уларга жароҳат бериши мумкин деб ўйлаб «олов эгалари» демади!

Арабчада олов «нор» бўлади. «Нор» деб араблар дўзахни ҳам айтишади. Умар розияллоҳу анҳу шунинг учун бу ерда «нор»ни ишлатмаган!

Бир куни халифа Ҳорун ар-Рашид шоир Асмаъийдан сўради:

- Мисвокнинг кўплиги араб тилида нима бўлади?

Асмаъий деди:

- «Яхшиликларингиз» нинг тескариси бўлади!

Мисвокнинг кўплиги арабчада «масовийк» бўлади. Бунинг «ёмонликларингиз» деган маъноси ҳам бор. Асмаъий шунинг учун бу сўзни ишлатмасдан «яхшиликларингиз»нинг тескариси бўлади, демоқда!

Абдулқодир Полвонов